

Goibekokale

ELGETA / Barikua / 2004eko irailaren 10a / 197. zenbakia

KOORDINATZAILEA: Irati Agirreazaldegia • Barrenkalea 33 20570 BERGARA • Tel.: 943 76 92 71 • Faxa: 943 76 29 77 • Posta elektronikoa: goibekokale@goiena.com • Lege gordailua: SS475/95



ARTXIBOA

Besteak beste, *Las mujeres de verdad tienen curvas* antzezlanak ikusteko aukera izango da Espaloian.

Espaloiko egitarauko hainbat emanaldi gertu

IRATI AGIRREAZALDEGI

Espaloia Kafe Antzokiaren baitan Kultura taldea osatu dute eta hasi da lehen pausoak ematen. Talde honek Espaloian egingo diren emanaldiak zein izango diren erabakitzen ditu. Urriari hasi eta abendura bitarteko hainbat saio jadanik adostuta daude.

Lau talde osatu nahi dituzte Espaloia Kafe Antzokian lau talde osatu nahi dituzte: filmak, umeak, euskara eta kultura. Horietatik kultura taldea hasi da lehen pausoak ematen.

Talde honek Espaloian egingo diren antzerki emanaldiak, dantza saioak, hitzaldiak eta kontzertuak zein izango diren erabakitzen ditu.

PROGRAMAZIOA ZEHAZTUZ

Bilerak egin dituzte eta hiru hilean behin programazioa gertatzea da Espaloikoen asmoa. Jadanik erabakita daude urritik abendura bitarteko hainbat emanaldi.

Kontzertuak, antzerki emanaldiak, zine kluba eta diapositibak izango dira besteak beste. Umeendako hainbat antzerki saio ere egitekotan dira.

Emanaldietako batzuk Topaguneko Kultura Errota egitasmoaren bidez ekarriko dituzte Espaloia Kafe Antzokira. Kultura Errotaren zarpigarren edizioa da aurtengoa eta iazko 10.000 ikusleak gainditzea da euren asmoa.

Kultura Errotako ekitaldiak urtero Elgetara ekartzeko aukera izan da, baina leku aproposik ezean ez dituzte antolatatu. Orain, Espaloian egingo dira emanaldiok, baita egitasmo honen baitakoak ez diren beste hainbat ere.

Urritik azarora arteko egitaraua

URRIA

7, eguena

19:00 Pili Arinen eskultura erakusketa.

10, domeka

20:00 Jabier Muguruzaren kontzertua.

29, barikua

22:30 R. Agirre eta Joserra Senperenaren antzerkia.

AZAROA

7, domeka

20:00 Igelaren Banda taldearen kontzertua.

12, barikua

22:30 *Las mujeres de verdad tienen curvas* antzezlanak.

ABENDUA

9, eguena

20:00 Bixente Askasibarren diapositiba emanaldia.

• Zine kluba:

Eguaztenetan 21:30ean.

• Danbako maketa lehiaketa:

Barikuetan 22:30ean (urriaren 22an hasita).

GARRAIOA

Autobus zerbitzu berriak abian dira

J.A.

Joan zen irailaren 8tik aurrera abian dira Elgeta Bergara eta Arrasaterekin lotzen dituen autobus zerbitzu berriak.

Udalaren eta Gipuzkoako Foru Aldundiaren arteko gestioen ostean, zerbitzu publiko bereziak jartzea adostu dute. Honela, neurri batean bada ere, elgetarrek denbora luzean garraio publiko-arekin izan dituzten arazoak konpondu nahi dituzte, euren joan-etorriak egiteko modua erraztuz. Izan ere, bi herri hauetara jende asko joaten da egunero eta zerbitzuak oso urriak ziren.

Elgetarrek, besteak beste, eskolara joateko erabiltzen dute autobusa. Izan ere, gazte asko kanpoan ikasten du.

Bestalde, errehabilitazioa egitera Bergarara zein Arrasatera joan behar izaten dute elgetarrek eta baita ospitalera ere.

BERGARA ETA ARRASATE

Autobusak 07:30ean, 11:30ean eta 14:45ean irtengo dira Elgetatik. Lehen Bergarara iritsiko da eta bertan 08:15ean Arrasatera doana hartu ahal izango dute bidaiariek. Bigarren Arrasatera arte joango da Bergaran geldialdia eginez. Azkena, berriz, Bergara artekoa da eta han beste autobus batzuk hartu beharko dituzte Arrasatera joan nahi dutenak.

Bueltatzeko, Arrasaten 11:05ean eta 14:20an irtengo dira autobusak, eta Bergaran 11:20an eta 14:40an, azken bi hauek zuzenean joango dira Elgetara.



Besteak beste, ikastetxeetara joaten dira elgetarrak autobusez.

LABUR

Nekazaritza ekologikoari buruzko ikastaroa antolatatu du Maya ingurumen taldeak

Maya ingurumen taldeak Ekonekazaritza federazioaren laguntzaz nekazaritza ekologikoari buruzko oinarrizko ikastaroa antolatatu du. Irailaren 27an hasi eta urriaren 13ra bitartean, astelehen, eguazten eta barikuetan arratsaldean hiru orduko saioak egingo dituzte 17:00etatik 20:00etara. Oinarrizko kontzeptuak, lurra, teknikak, negutegiak, barazkien babes eta haziak izango dira ikastaroan jorratuko dituzten gaiak. Ikastaro teorikoa amaituta azken egunean nekazaritza ekologikoa egiten duen baserri bat bisitatuko dute. Ikastaroan parte hartu nahi dutenak Ekonekazaritzako bulegora 943 76 18 00 (Josune) edo udaletxera 943 76 80 22 (Juan Ramon) deitu behar dute izena emateko. 30 euro ordaindu beharko dira.

ELKARRIZKETA

OLATZ SARASOLA/HAURRESKOLAKO IRAKASLEA

“Afektiboki eurengana iristeko gai izan behar da umeekin jarduteko”

I.A.
Datorren irailaren 15ean hasiko da ikasturtea Elgetako haurreskola berrian. Olatz Sarasola tolosarra izango da bertan irakasle, eta kurtsoa gertatzen ziharduen bitartean tarte bat egin digu haurreskolaren berri emateko.

Datorren astean jarriko da abian haurreskola Elgetan. Zein da haurreskolaren helburu nagusia?

Lanean diharduten gurasoei laguntza eta euren seme-alabei hezkuntza eskaintzea.

Zenbat ume egongo dira ikasturte hasieran Elgetako haurreskolan?

Ikasturtea hiru hurrek hasiko dute. Ume kopurua eskola bakoitzaren arabera mugatzen da eta Elgetakoan gehienez hamar egon daitezke, hiru baino gutxiago egonez gero itxi egingo litzateke. Izena eman duten haurrak 20 hilabetetik beherakoak dira, baina 0 eta 3 urte arteko umeek dute lekua hemen.

Zer aurkituko dute haurreskolara datozen umeek?


Batetik gela bera. Bertan batetik lotarako edo atsédenerako gela bat egongo da sehaskekin; bestetik gune zabal bat hiru zatitan banatuko dena: hizkuntza lantzeko gunea, jolasen txokoa eta umeek euren kabuz ibiltzeko beste tarte bat; eta hirugarrenik sukaldia eta komunak bai niretzat eta baita umeendako ere. Kanpoan jolastokia izango dute.

Zer egingo dute hurrek?

Umeak ezagutu ahala antolatuko dugu egin beharrekoa, baina eskolaurreko gela batean egiten diren gauza bertsuak egingo ditugu hemen: jolasak, ipuinak, psikomotrizitatea... txikien adina kontuan hartuta, noski.

Zein ezaugarri behar ditu hezitzaile batek adin honetako umeekin jarduteko?

Titulazio egokiaz gain, afektiboki umeengana iristeko gai-



I.A.

“Ikasturtea hiru hurrek hasiko dute baina hamar umerendako tokia dago haurreskolan”

tasuna edukitzea. Umeek gurasoen papera egingo ez duen heldu baten beharra dute eta guk ahalik eta xamurtasun eta sentikortasun gehien eman behar diégu umeek gurekiko konfiantza izan dezaten. Pazientzia izatea ere ez dago batere gaizki.

“Besteak beste, jolasak, ipuinak eta psikomotrizitatea egingo ditugu umeekin”

Nola animatuko zenituzke elgetarrak umeak haurreskolara ekartzeko?

Gelara etortzeko esango nieke eta hemengo funtzionamendua ikusteko. Horretarako aurrez jakinaraztea komeni da, 08:00etatik 16:00etara egongo da zabalik.

ERREPIDEAK

Aurten hasiko dira saihebidetako lanak

I.A.

Saihebidetaren proiektuak hainbat ezbairida sortu ostean, lanak egiteko erabakia hartu zuten eta urtea amaitu aurretik obren lehen fasearekin hasteko asmoa dute.

Lehenengo fase hau nork egingo duen erabakitzeko lehiaketa publikoa deitu zuten, eta zortzi proiektu aurkeztu dira.

Proiektu onena eta ekonomikoki egokiena zein den erabakitzeara geratzen da orain, eta horre-

tarako hilabetea amaitu arteko epea egongo da. Behin izendatutakoan lanak urtea amaitu aurretik hasiko dituzte. Udaletik esan digutenez, baliteke urrian edo azaroan ekitea. Aurreikusitako kostua 1.496.773 euro da.

Bestalde, Bergara eta Elgeta arteko errepidean, Uberako eta Izarreko bihurtzeko konpontzeko zazpi proiektu aurkeztu dituzte. Lan hauek ere urtea amaitu aurretik hasi nahi dituzte. Proiekturako aurreikusitako kostua 1.088.865 euro da.

KIROLAK

Irailaren 20an hasiko dira kirol zerbitzuak


I.A.

Datorren irailaren 20an, yogari buruzko ikastaro labur batekin hasiko dira kirol zerbitzuak.

Izena eman nahi dutenek udaletxera (943 76 80 22) edo kiroldegira (943 76 82 84) jo beharko dute. Bestalde, instalazioak erabiltzeko aldikako erreserbak kiroldegian egingo dira, hilabeteko edota urteko erreserbak, berriz, Udala Kirol Zerbitzuan.

Aurten ere aukera zabala dago kirol zerbitzuetan: sasoian egoteko gimnasia, edadetuen gimnasia, oinarrizko soin hezkuntza, txikien dantza eta aerobika, yoga, tay-chia eta aerobika eta fitness delakoa; azken honen baitan tonifikazioa eta dantza egongo dira.

Ikastaroak irailaren 20a eta urriaren 7a bitartean hasiko dira. Taldea osatzeko gutxienez zortzi lagun beharko dira eta izena lehenbailehen ematea komeni da.



ARTXIBOA

Yogari buruzko oinarrizko ikastaroa izango da aurtengo lehenengoa.

Patxi Taberna

• Bokata goxoak • Plater konbinatuak
• Espezialitatea: Tripakiak

Salbador, 3 Tel.: 943 768 093 Elgeta

Aperribay, s.l.

Marmoldegi eta granitoak

Pagatza indus. z/g.
Tel. eta faxa: 943 78 90 21

20690 ELGETA

JAR EZAZU HEMEN ZURE PUBLIZITATEA

Goibekokale

BOLU SUKALDEAK



2000 eguneko garantia.
Aurrekontua konpromiso gabe.

Bolu 22 -behea . Bergara . Telefonoa eta faxa: 943 76 27 02

ELKAR ELEKTRAGINTZA

**ZURE
ZERBITZURA!!**

Mota guztietako instalazioak



943 76 00 00

Koldo Eleizalde, 8.
BERGARA